



U P U T S T V O

o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje

(Neslužbeni prečišćeni tekst)

Obuhvata:

- Uputstvo o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje («Službeni glasnik BiH», br. 37/10),
- Ispravke Uputstva o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje («Službeni glasnik BiH», br. 57/10) i
- Uputstvo o izmjenama i dopunama Uputstva o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje broj: 05-1-02-2- 2113/10 od 12.08.2010. godine.

Sarajevo, Avgust 2010. godine

POGLAVLJE I. UVODNE NAPOMENE

Član 1. (Primjena)

(1) Ovim uputstvom za primjenu članova 1.5 stav (3) i (5), 2.2, 2.3, 2.4 i 2.19 Izbornog zakona Bosne i Hercegovine (u daljnjem tekstu: Izborni zakon BiH) utvrđuju se: kvalifikacije, broj članova, postupak žrijebanja i imenovanja članova biračkih odbora, kvalifikacije, broj članova i postupak imenovanja članova biračkih odbora u diplomatsko-konzularnim predstavništvima Bosne i Hercegovine (u daljnjem tekstu: DKP-i BiH), kvalifikacije, broj članova i postupak imenovanja članova mobilnih timova za glasanje (u daljnjem tekstu: mobilni tim) postupak obuke, provjere znanja i certificiranja članova biračkih odbora i mobilnih timova.

(2) U smislu ovog uputstva, članovi biračkog odbora su: predsjednik, članovi, zamjenik predsjednika i zamjenici članova.

(3) U smislu ovog uputstva, članovi mobilnog tima su: predsjednik, članovi, zamjenik predsjednika i zamjenici članova.

(4) Pod političkim subjektom u smislu ovog uputstva podrazumijeva se politička stranka, nezavisni kandidat, koalicija ili lista nezavisnih kandidata, ovjerena za učešće na izborima u skladu s Izbornim zakonom BiH.

POGLAVLJE II. KVALIFIKACIJE

Odjeljak A. Birački odbori u Bosni Hercegovini

Član 2. (Kvalifikacije)

(1) Pored općih uslova propisanih članom 2.2. stav (1) Izbornog zakona BiH, član biračkog odbora mora ispunjavati posebne uslove:

- a) da ima prebivalište u općini za koju se imenuje birački odbor, po mogućnosti da je upisan u izvod iz Centralnog biračkog spiska za biračko mjesto za koje se imenuje i
- b) da ima najmanje završenu srednju školu, odnosno III., IV. ili V. stepen stručne spreme.

(2) Prilikom imenovanja članova biračkih odbora i njihovih zamjenika, izborna komisija vodi računa o multietničkom sastavu biračkog odbora, gdje je to moguće.

(3) Prilikom imenovanja članova biračkih odbora i njihovih zamjenika, izborna komisija nastojat će osigurati da broj članova manje zastupljenog spola bude najmanje 1/3 od ukupnog broja članova.

Član 3. (Broj članova)

(1) Birački odbor sastoji se od predsjednika i dva člana i njihovih zamjenika ako je u izvodu iz Centralnog biračkog spiska za određeno biračko mjesto upisano do 350 birača.

(2) Birački odbor sastoji se od predsjednika i četiri člana i njihovih zamjenika ako je u izvodu iz Centralnog biračkog spiska za određeno biračko mjesto upisano više od 350 birača.

Odjeljak B. Birački odbori u DKP-ima BiH

Član 4. (Kvalifikacije)

(1) Pored općih uslova propisanih članom 2.2. stav (1) Izbornog zakona BiH, član biračkog odbora u DKP-ima BiH mora ispunjavati posebne uslove:

- a) da je upisan u izvod iz Centralnog biračkog spiska za birače koji glasaju izvan BiH za glasanje u DKP-u BiH koji je određen za glasanje, a izuzetno, ako nema dovoljno kandidata koji su upisani za glasanje u DKP-u BiH, može i ako je registriran za glasanje poštom i
- b) da ima najmanje završenu srednju školu.

(2) Centralna izborna komisija Bosne i Hercegovine (u daljnjem tekstu: Centralna izborna komisija BiH) imenuje članove biračkih odbora i njihove zamjenike, po prijedlogu Ministarstva vanjskih poslova Bosne i Hercegovine (u daljnjem tekstu: Ministarstvo vanjskih poslova BiH). U biračkom odboru obavezno se osigurava zastupljenost članova iz svakog konstitutivnog naroda.

(3) Centralna izborna komisija BiH nastojat će, prilikom imenovanja članova biračkih odbora i njihovih zamjenika, osigurati da broj članova manje zastupljenog spola bude najmanje 1/3 od ukupnog broja članova.

Član 5. (Broj članova)

(1) Birački odbor sastoji se od predsjednika i dva člana i njihovih zamjenika ako je u izvodu iz Centralnog biračkog spiska za birače koji glasaju izvan BiH za glasanje u DKP-u BiH, koji je određen za glasanje, upisano do 300 birača.

2) Birački odbor sastoji se od predsjednika i četiri člana i njihovih zamjenika ako je u izvodu iz Centralnog biračkog spiska za birače koji glasaju izvan BiH za glasanje u DKP-u BiH, koji je određen za glasanje, upisano više od 300 birača.

Odjeljak C. Mobilni timovi

Član 6. (Kvalifikacije)

(1) Pored općih uslova propisanih članom 2.2. stav (1) Izbornog zakona BiH, član mobilnog tima mora ispunjavati posebne uslove:

- a) da ima prebivalište u općini za koju se imenuje mobilni tim i
- b) da ima najmanje završenu srednju školu, odnosno III., IV. ili V. stepen stručne spreme.

(2) Izborna komisija prilikom imenovanja članova mobilnog tima i njihovih zamjenika vodi računa o multietničkom sastavu mobilnog tima, gdje je to moguće.

(3) Izborna komisija će, prilikom imenovanja članova mobilnog tima i njihovih zamjenika, nastojati osigurati da broj članova manje zastupljenog spola bude najmanje 1/3 od ukupnog broja članova.

Član 7. (Broj članova)

(1) Mobilni tim sastoji se od predsjednika i dva člana i njihovih zamjenika.

(2) Broj mobilnih timova utvrđuje izborna komisija rukovodeći se ukupnim brojem i prostornom raspoređenošću birača koji će glasati posredstvom mobilnog tima.

POGLAVLJE III. POSTUPAK ŽRIJEBANJA I IMENOVANJA

Odjeljak A. Birački odbori u Bosni Hercegovini

Član 8. (Prijedlozi i žrijebanje)

(1) U biračkim odborima zastupljeni su predstavnici **političkih subjekata** koji su ovjereni za učešće na izborima u izbornoj jedinici u kojoj se imenuju birački odbori, primjenjujući sistem žrijebanja.

(2) Koalicija ima status političke stranke (u smislu člana 4.13 stav (2) Izbornog zakona BiH) u izbornom procesu.

(3) Na izborima na kojima se biraju i predstavnici nacionalnih manjina pod nezavisnim kandidatom podrazumijeva se i kandidat kojeg je predložilo udruženje, odnosno drugi registrirani organizirani oblik djelovanja nacionalnih manjina i grupa od najmanje 40 građana koji imaju biračko pravo, u smislu člana 13.14 stav (5) Izbornog zakona BiH ima status nezavisnog kandidata, u izbornom procesu, odnosno u postupku žrijebanja i imenovanja biračkih odbora.

(4) Centralna izborna komisija BiH, prije utvrđenog datuma žrijebanja, dostavlja svim izbornim komisijama listu **političkih subjekata** koji učestvuju u postupku žrijebanja za dodjelu mjesta u biračkim odborima na području njihove osnovne izborne jedinice. **Na listi se ne nalazi koalicija koju čine političke stranke koje u toj izornoj jedinici imaju kandidate i kandidatske liste i samostalno učestvuju u žrijebanju.**

(5) Na listi iz stava (4) ovog člana jedna politička stranka može se pojaviti samo jednom **ili** samostalno ili kao članica koalicije.

(6) U istom biračkom odboru na istom biračkom mjestu ne može biti zastupljen **politički subjekt** s više od jednog predstavnika.

(7) Izborna komisija obavezna je blagovremeno uputiti poziv svim **političkim subjektima** iz stava (4) ovog člana ovjerenim za učešće na izborima u izornoj jedinici za koju se imenuje birački odbor da prisustvuju postupku žrijebanja koje će obaviti izborna komisija najkasnije 60 dana prije dana održavanja izbora. **Političkim subjektima** koji nisu prisustvovali postupku žrijebanja izborna komisija dužna je dostaviti rezultate po okončanom postupku žrijebanja odmah, a najkasnije u roku dva dana.

(8) Nakon okončanog postupka žrijebanja iz člana 7. ovog uputstva, a najkasnije u roku od sedam dana, **politički subjekti** dužni su izornoj komisiji dostaviti svoje prijedloge za članove biračkih odbora i njihove zamjenike za biračka mjesta gdje su dobili mjesto.

(9) Prijedlog za članove biračkih odbora, **politički subjekti** podnose u skladu s odredbama Izbornog zakona BiH i ovog uputstva, vodeći računa da predloženi kandidati budu upisani u izvod iz Centralnog biračkog spiska za to biračko mjesto i da su fizički sposobni za obavljanje poslova u biračkom odboru.

(10) **Politički subjekti** obavezni su, prilikom dostavljanja prijedloga za članove biračkih odbora, izornoj komisiji dostaviti obrasce -SG-1- izjava predloženog člana biračkog odbora/mobilnog tima, svojeručno potpisane od predloženih kandidata za članove biračkih odbora i ovjerene pečatom i potpisom ovlaštenog lica **političkog subjekta**.

(11) **Politički subjekt** će, ako to izborna komisija zatraži, dostaviti dokaze o posjedovanju kvalifikacija i ispunjavanju uslova predloženih kandidata za članove biračkih odbora/mobilnih timova.

(12) Ako **politički subjekt** ne dostavi obrazac iz stava (10), odnosno podatke iz stava (11) ovog člana, izborna komisija takav prijedlog za imenovanje člana biračkog odbora/mobilnog tima neće razmatrati.

(13) Obrazac - SG -1- izjava predloženog člana biračkog odbora/mobilnog tima sastavni je dio ovog uputstva.

Član 9. (Postupak žrijebanja)

(1) Izborna komisija, u pozivu iz člana 8. stav (7) ovog uputstva, obavještava **političke subjekte** o terminu javnog žrijebanja redosljeda **političkih subjekata** i biračkih mjesta za imenovanje članova biračkih odbora.

(2) Postupak žrijebanja provodi se na sljedeći način:

a) Žrijebanjem se utvrđuje redosljed svih **političkih subjekata**, sa liste iz člana 8. stav (4) ovog uputstva. Listići s nazivima i šiframa svih **političkih subjekata** ovjerenih za izbore za tu izbornu jedinicu, ubacuju se u providnu posudu za žrijebanje i pristupa se njihovom izvlačenju. Član izborne komisije izvlači jedan po jedan listić s nazivima **političkih subjekata** i naglas saopćava podatke o šifri i nazivu **političkog subjekta** koji je izvučen, te na taj način utvrđuje redosljed **političkih subjekata**.

b) izborna komisija će na dan održavanja žrijebanja utvrditi koliko koji ovjereni **politički subjekt** dobija mjesta u biračkim odborima, na način što će prvo izračunati ukupan broj mjesta u biračkim odborima, sabiranjem ukupnog broja članova biračkih odbora sa svih biračkih mjesta. U postupku utvrđivanja ukupnog broja mjesta u biračkim odborima računaju se članovi biračkih odbora, bez zamjenika. Ukupan broj mjesta u biračkim odborima izborna komisija dijeli sa ukupnim brojem **političkih subjekata** sa liste iz člana 8. stav (4) ovog uputstva. Ukoliko količnik dobijen navedenim dijeljenjem završava decimalnim brojem, izborna komisija će navedeni broj zaokružiti tako što će sve decimalne brojeve od 0.5 i veće zaokružiti na veći broj, a decimalne brojeve manje od 0.5 zaokružiti na manji broj (primjer: 9.50 zaokružuje se na 10, a 9,49 zaokružuje se na 9).

c) količnik koji se dobije računskom operacijom iz tačke b) ovog člana primjenjuje se na sljedeći način:

- nezavisni kandidati i **političke stranke** koje samostalno učestvuju u žrijebu dobijaju onaj broj mjesta u biračkim odborima koliki je utvrđeni količnik;

- koalicija koja u svom sastavu nema **političke stranke** koje samostalno imaju ovjerenu kandidatsku listu ili kandidata za bilo koji nivo vlasti u osnovnoj izornoj jedinici, dobija onaj broj mjesta u biračkim odborima, koliki je utvrđeni količnik;

- koaliciji koju čine i **političke stranke** koje samostalno učestvuju u žrijebanju i **političke stranke** koje nemaju samostalnog kandidata ili kandidatsku listu na glasačkom listiću u osnovnoj izornoj jedinici, pripada umanjen količnik, koji se dobije na taj način da se utvrđeni količnik podijeli sa brojem **političkih stranaka** u koaliciji i pomnoži brojem **političkih stranaka** u koaliciji koje nemaju samostalnog kandidata ili kandidatsku listu u toj izornoj jedinici.

d) Popunjavanje mjesta u biračkim odborima vrši se na način da se uzme prvo biračko mjesto s liste biračkih mjesta i članstvo u biračkom odboru za to biračko mjesto popunjava se nazivima **političkih subjekata** s liste **političkih subjekata** prema redoslijedu koji je utvrđen žrijebanjem, dok se ne popuni ukupno članstvo tog biračkog odbora. Uzima se drugo biračko mjesto s liste i članstvo u biračkom odboru popunjava se narednim nazivima **političkih subjekata** s liste **političkih subjekata**. Postupak se ponavlja za svako biračko mjesto do konačnog popunjavanja svih mjesta u biračkim odborima za sva biračka mjesta.

e) Ako se dođe do kraja liste **političkih subjekata**, a preostalo je još biračkih mjesta, postupak se ciklično ponavlja s početka liste **političkih subjekata**.

f) Ako broj ovjerenih **političkih subjekata** prelazi ukupan broj članova biračkih odbora u datoj općini, izborna komisija popunjava mjesta u biračkim odborima po redoslijedu žrijebanja dok ne popuni sva mjesta u svim biračkim odborima. **Politički subjekti** koji su preostali ne učestvuju u raspodjeli mjesta u biračkom odboru, osim ako neki **politički subjekti** koji su ušli u raspodjelu ne dostave izbornoj komisiji u zakonskom roku svoje prijedloge. U tom slučaju izborna komisija, prema redoslijedu utvrđenom žrijebanjem, mjesto u biračkom odboru dodjeljuje sljedećem **političkom subjektu**.

g) stranke koje su članice koalicije i njihova koalicija ne mogu dobiti mjesta u istom biračkom odboru. Kada se dogodi takva situacija, izborna komisija vrši zamjenu mjesta tako što političku stranku ili koaliciju premješta u naredni birački odbor, gdje je zamjena moguća, a da se ne naruši naprijed navedeni princip. U slučaju da zamjena nije moguća, iz bilo kojeg razloga, politička stranka ili koalicija gube mjesto u biračkom odboru, a popunu tog mjesta vrši izborna komisija iz evidencije članova ranijih biračkih odbora koje posjeduje.

(3) Mjesta zamjenika članova biračkih odbora popunjavaju se iz istih **političkih subjekata** koji su žrijebanjem određeni za popunjavanje članstva za dato biračko mjesto.

(4) Nakon završenog perioda za dostavljanje prijedloga **političkih subjekata** izborna komisija pristupa imenovanju članova biračkih odbora tako što, za biračko mjesto za koje je utvrđen redoslijed **političkih subjekata**, imenuje kandidate koje su predložili **politički subjekti**, ako ispunjavaju kriterije propisane ovim uputstvom.

(5) Izborna komisija imenuje predsjednike biračkih odbora i njihove zamjenike između članova, odnosno zamjenika članova biračkih odbora, vodeći računa o adekvatnoj zastupljenosti **političkih subjekata**

(6) Ako **politički subjekti** nemaju dovoljno kandidata za članove biračkih odbora i njihove zamjenike, izborna komisija utvrđuje prijedloge kandidata i imenuje ih iz evidencije o sastavu i radu ranijih biračkih odbora koje posjeduje. Ako **politički subjekti** predlože samo jednog kandidata za žrijebanjem dobiveno mjesto u biračkom odboru, taj kandidat je član biračkog odbora, dok njegovog zamjenika imenuje izborna komisija iz svojih ranijih evidencija.

(7) Izborne komisije obavezne su **političkim subjektima** dostaviti akt o imenovanju članova biračkih odbora. Ovaj akt treba da sadrži: ime i prezime predsjednika i zamjenika predsjednika biračkih odbora, članova biračkih odbora i njihovih zamjenika, naziv **političkog subjekta** čiji su oni predstavnici, broj i lokaciju biračkog mjesta, obrazloženje na koji način je izvršeno imenovanje i pouku o pravnom lijeku. Akt o imenovanju članova biračkih odbora izborne komisije obavezne su dostaviti i Centralnoj izbornoj komisiji BiH.

(8) Ako izborna komisija ne imenuje biračke odbore u roku utvrđenom u članu 2.19 stav (3) Izbornog zakona BiH, Centralna izborna komisija BiH imenovat će biračke odbore i akt o imenovanju dostaviti **političkim subjektima** preko nadležnih izbornih komisija.

(9) Ako su politička stranka ili nezavisni kandidat ovjereni za izbore kao koalicija ili kao lista nezavisnih kandidata, u sastav jednog biračkog odbora može biti imenovan samo jedan predstavnik koalicije, odnosno jedan predstavnik liste nezavisnih kandidata.

(10) Na odluku općinske izborne komisije o imenovanju predsjednika, članova biračkih odbora i njihovih zamjenika može se uložiti prigovor općinskoj izbornoj komisiji u roku od 24 sata od prijema odluke o imenovanju biračkih odbora. Na odluku općinske izborne komisije kojom je odlučeno o prigovoru može se uložiti žalba Centralnoj izbornoj komisiji BiH u roku od 48 sati od prijema odluke općinske izborne komisije.

Član 10.

(Glasanje predsjednika i članova biračkih odbora)

(1) Predsjednik i članovi biračkog odbora za određeno biračko mjesto treba da budu, u pravilu, upisani u izvod iz Centralnog biračkog spiska za to biračko mjesto. Predsjednik i članovi biračkog odbora glasat će prije nego što prvi birač dođe na biračko mjesto da glasa.

(2) Izuzetno od odredbe iz stava (1) ovog člana, izborna komisija može imenovati predsjednika ili članove biračkog odbora koji nisu upisani u izvod iz Centralnog biračkog spiska za to biračko mjesto, a u obrazloženju akta o imenovanju biračkih odbora izborna komisija dužna je dati objašnjenje zašto je ta lica imenovala u biračke odbore.

(3) Predsjedniku ili članovima biračkog odbora iz stava (2) ovog člana bit će omogućeno da budu odsutni s biračkog mjesta onoliko vremena koliko im bude potrebno da mogu otići na biračko mjesto gdje su upisani u izvod iz Centralnog biračkog spiska.

Član 11.

(Zamjenici članova biračkih odbora)

(1) Zamjenik predsjednika, odnosno zamjenici članova biračkog odbora učestvuju u radu biračkog odbora samo ako je predsjednik, odnosno član biračkog odbora spriječen da dođe na biračko mjesto na dan održavanja izbora ili ako moraju iz opravdanih razloga napustiti biračko mjesto u toku rada na dan održavanja izbora.

(2) Zamjenik predsjednika, odnosno zamjenici članova biračkog odbora, koji nisu bili angažirani na biračkom mjestu do zatvaranja biračkog mjesta, obavezno učestvuju u brojanju glasova, ako je na biračkom mjestu upisano više od 500 birača.

(3) Odredbe iz stava (2) ovog člana odnose se samo na redovna biračka mjesta. Zamjenik predsjednika, odnosno zamjenici članova biračkog odbora koji učestvuju u radu biračkog odbora kod prebrojavanja glasačkih listića poslije zatvaranja biračkog mjesta ne učestvuju u procesu donošenja odluka, osim ako ne zamjenjuju predsjednika, odnosno člana biračkog odbora.

Odjeljak B. Birački odbori u DKP-ima BiH

Član 12. (Prijedlozi)

(1) Centralna izborna komisija BiH, najkasnije u roku od 65 dana od dana održavanja izbora, upućuje zahtjev Ministarstvu vanjskih poslova BiH da dostavi prijedlog članova biračkih odbora u DKP-ima BiH, koji su određeni za biračko mjesto za glasanje državljana Bosne i Hercegovine, koji su se prijavili za glasanje lično u DKP-ima BiH.

(2) Centralna izborna komisija BiH, uz zahtjev iz stava (1) ovog člana, dostavlja Ministarstvu vanjskih poslova BiH i odluku o DKP-ima BiH koji su određeni za glasanje.

(3) Ministarstvo vanjskih poslova BiH, najkasnije u roku od 10 dana od dana prijema zahtjeva iz stava (1) ovog člana, dostavlja Centralnoj izbornoj komisiji BiH prijedlog za članove biračkih odbora i njihove zamjenike u DKP-ima BiH, vodeći računa da predloženi kandidati ispunjavaju uslove propisane članom 4. ovog uputstva.

Član 13. (Glasanje predsjednika i članova biračkih odbora)

Predsjednik i članovi biračkog odbora glasat će prije nego što prvi birač dođe na biračko mjesto da glasa.

Član 14. (Zamjenici članova biračkih odbora)

(1) Zamjenik predsjednika, odnosno zamjenici članova biračkog odbora učestvuju u radu biračkog odbora samo ako je predsjednik, odnosno član biračkog odbora spriječen da dođe na biračko mjesto na dan održavanja izbora ili ako moraju iz opravdanih razloga napustiti biračko mjesto u toku rada na dan održavanja izbora.

(2) Zamjenik predsjednika, odnosno zamjenici članova biračkog odbora u slučaju iz stava (1) ovog člana učestvuju u procesu donošenja odluka.

Odjeljak C. Mobilni timovi

Član 15. (Prijedlozi, žrijebanje i imenovanje)

(1) Na postupak žrijebanja i imenovanja mobilnih timova primjenjuju se odredbe iz Poglavlja III. Odjeljak A ovog uputstva, a koje se odnose na postupak žrijebanja i imenovanja biračkih odbora, i to:

- član 8. st. (1), (2), (3), (4), (5), (6), (10), (11) i (12),
- član 9. stav (2) tač. **e** i **f**, st. (3), (4), (5), (6) i (9) i
- član 11. stav (1).

(2) Popunjavanje mjesta u mobilnim timovima vrši se u skladu s redoslijedom **političkih subjekata** koji je utvrđen prilikom žrijebanja iz člana 9. stav (2) tačka a) ovog uputstva, a nastavlja se od **političkog subjekta** kojem je posljednjem dodijeljeno mjesto u biračkom odboru, **primjenjujući utvrđene principe u članu 9. stav (2) tačke b), c) i g) ovog uputstva.**

(3) Nakon okončanog postupka utvrđivanja mjesta u mobilnim timovima, izborna komisija će **političkim subjektima** koji su dobili mjesto u mobilnom timu, najkasnije u roku od 15 dana prije održavanja izbora, uputiti zahtjev za dostavljanje prijedloga za članove mobilnih timova i njihove zamjenike.

(4) **Politički subjekti** iz stava (3) ovog člana dužni su izornoj komisiji dostaviti svoje prijedloge za članove mobilnih timova i njihove zamjenike najkasnije u roku od tri dana od dana prijema zahtjeva.

(5) **Politički subjekti** podnose prijedlog za članove mobilnih timova u skladu s odredbama Izbornog zakona BiH i ovog uputstva, vodeći računa da predloženi kandidati budu fizički sposobni za obavljanje poslova u mobilnom timu.

(6) Izborne komisije imenuju članove mobilnih timova najkasnije u roku od 10 dana prije dana održavanja izbora.

(7) Izborne komisije obavezne su **političkim subjektima** koji su ovjereni za učešće na izborima u izornoj jedinici u kojoj se imenuju mobilni timovi dostaviti akt o imenovanju članova mobilnih timova. Ovaj akt treba da sadrži: ime i prezime predsjednika i zamjenika predsjednika mobilnog tima, članova mobilnih timova i njihovih zamjenika, naziv **političkog subjekta** čiji su oni predstavnici, obrazloženje na koji način je izvršeno imenovanje i pouku o pravnom lijeku. Akt o imenovanju članova mobilnih timova izborne komisije obavezne su dostaviti i Centralnoj izornoj komisiji BiH.

(8) Ako izborna komisija ne imenuje mobilne timove u roku utvrđenom u članu 15. stav (6) ovog uputstva, Centralna izborna komisija BiH imenovat će mobilne timove i akt o imenovanju dostaviti **političkim subjektima** preko nadležnih izbornih komisija.

(9) Na odluku općinske izborne komisije o imenovanju predsjednika, članova biračkih odbora i njihovih zamjenika može se uložiti prigovor općinskoj izbornoj komisiji u roku od 24 sata od prijema odluke o imenovanju biračkih odbora. Na odluku općinske izborne komisije kojom je odlučeno o prigovoru može se uložiti žalba Centralnoj izbornoj komisiji BiH u roku od 48 sati od prijema odluke općinske izborne komisije.

POGLAVLJE IV. OBUKA, PROVJERA ZNANJA, METODE I KRITERIJI PROVJERE ZNANJA I CERTIFICIRANJE

Član 16. (Obuka)

(1) U skladu s planom i programom edukacije, Centralna izborna komisija BiH organizirat će obuku predsjednika i članova biračkih odbora u DKP-ima BiH, kao i njihovih zamjenika, o načinu glasanja i brojanju koverti s glasačkim listićima.

(2) U skladu s planom i programom edukacije koji donosi Centralna izborna komisija BiH, izborne komisije organizirat će obuku predsjednika i članova biračkih odbora, kao i njihovih zamjenika o načinu glasanja i brojanja glasova.

(3) U skladu s planom i programom edukacije, koji donosi Centralna izborna komisija BiH, izborne komisije organizirat će obuku predsjednika i članova mobilnih timova, kao i njihovih zamjenika o načinu glasanja i brojanju koverti s glasačkim listićima.

(4) Ako član biračkog odbora, odnosno mobilnog tima ne prisustvuje obuci iz st. (1), (2) i (3) ovog člana, bit će razriješen dužnosti i na njegovo mjesto će izborna komisija imenovati člana iz evidencije o sastavu i radu biračkih odbora, odnosno mobilnih timova koje posjeduje.

Član 17. (Provjera znanja i certificiranje)

(1) Nakon provedene obuke Centralna izborna komisija BiH će, prema metodologiji koju utvrdi, izvršiti provjeru znanja i uspješnim predsjednicima i članovima biračkih odbora i njihovim zamjenicima u DKP-ima BiH dodijeliti certifikate.

(2) Nakon provedene obuke, izborna komisija izvršit će provjeru znanja i uspješnim predsjednicima biračkih odbora, odnosno mobilnih timova i njihovim zamjenicima dodijeliti certifikate.

(3) Predsjednici i zamjenici predsjednika biračkih odbora, odnosno mobilnih timova koji su dobili certifikat dužni su učestvovati u obuci članova biračkih odbora, odnosno mobilnih timova, koje organizira općinska izborna komisija na način da:

- a) pomažu izbornoj komisiji u provođenju praktičnog dijela obuke i vježbe članova biračkih odbora, odnosno mobilnih timova i njihovih zamjenika,
- b) organiziraju obuku članova biračkih odbora, odnosno mobilnih timova i njihovih zamjenika u biračkom odboru/mobilnom timu u kojem su imenovani za predsjednika, odnosno zamjenika predsjednika, u posebnom dopunskom terminu.

(4) Izborna komisija će, nakon izvršene provjere znanja, uspješnim članovima biračkih odbora, odnosno mobilnih timova i njihovim zamjenicima također dodijeliti certifikate.

(5) Izgled certifikata iz st. (1), (2) i (4) ovog člana utvrđuje Centralna izborna komisija BiH i certifikat je sastavni dio ovog uputstva.

(6) Izborna komisija vodi evidenciju izdatih certifikata a ona sadrži ime i prezime te jedinstveni matični broj lica kojem je uručen certifikat i serijski broj certifikata.

Član 18.

(Metode i kriteriji za provjeru znanja)

(1) S ciljem standardizacije izbornog procesa, Centralna izborna komisija BiH utvrđuje metode i kriterije za provjeru znanja imenovanih predsjednika i članova biračkih odbora, odnosno mobilnih timova, kao i njihovih zamjenika.

(2) Provjera znanja za učesnike iz stava (1) ovog vrši se pismenim testiranjem, a s ciljem efikasnosti i postizanja potrebne dinamike za realizaciju ove aktivnosti, primjenjuje se metoda ponuđenih odgovora.

(3) Testiranjem će biti obuhvaćena pitanja iz oblasti poznavanja načina glasanja, brojanja glasačkih listića, pakovanja izbornog materijala i drugo, koja su podijeljena u tri različita uzorka testa. Izborna komisija će svakom kandidatu koji pristupa testiranju dati jedan uzorak testa, vodeći računa da kandidati koji na testiranju sjede u neposrednoj blizini dobiju različite uzorke testa. Testiranje traje 30 minuta.

(4) Izborna komisija će prije početka testiranja primjerke testova ovjeriti pečatom izborne komisije a nakon provedenog testiranja i provjere uspješnosti kandidata i potpisom predsjednika, odnosno člana izborne komisije.

(5) Uspješnim će se smatrati oni kandidati koji prilikom testiranja ponude **50%** ili više od **50 %** tačnih odgovora.

(6) Kandidati koji prilikom testiranja ponude 75% ili više tačnih odgovora smatrat će se naročito uspješnim.

(7) Kandidati koji ne budu uspješni na testiranju bit će razriješeni dužnosti i na njihovo mjesto izborna komisija imenovat će članove iz evidencije **članova** biračkih odbora, odnosno mobilnih timova koju posjeduje.

(8) Izborna komisija provodit će postupak obuke i provjere znanja iz čl. 17. i 18. ovog uputstva, sve dok u biračke odbore ne budu imenovani kandidati koji su sa uspjehom prošli testiranje.

(9) Izborne komisije dužne su popunjene testove čuvati pohranjene u svojoj arhivi. Izborne komisije će, ako to zatraži Centralna izborna komisija BiH, dostaviti joj na uvid popunjene testove imenovanih predsjednika i članova biračkih odbora, odnosno mobilnih timova, njihovih zamjenika kao i drugih kandidata koji su pristupali testiranju.

(10) Testovi iz stava (3) ovog člana sastavni su dio ovog uputstva.

POGLAVLJE V. NAKNADA

Član 19.

(Naknada za rad u biračkom odboru)

(1) Predsjednik i članovi biračkih odbora i njihovi zamjenici, ako su učestvovali u radu biračkog odbora, imaju pravo na naknadu za svoj rad.

(2) Zamjenik predsjednika i zamjenici članova biračkog odbora koji su učestvovali u brojanju glasova imaju pravo na odgovarajuću naknadu.

(3) Predsjednik i članovi mobilnih timova i njihovi zamjenici, ako su učestvovali u radu mobilnog tima, imaju pravo na naknadu za svoj rad.

(4) Odluku o visini naknade iz st. (1), (2) i (3) ovog člana donosi izborna komisija, u skladu sa Izbornim zakonom BiH.

(5) Odluku o visini naknade iz st. (1), (2) i (3) ovog člana za provođenje općih izbora donosi Centralna izborna komisija BiH, u skladu sa Izbornim zakonom BiH.

(6) Odluku o visini naknade za rad biračkih odbora u DKP-ima BiH donosi Centralna izborna komisija BiH.



Na osnovu člana 2.2, 2.3 i 2.19 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10), člana 8. i 16. Uputstva o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje i člana 173. Zakona o upravnom postupku ("Službeni glasnik BiH", br. 29/02, 12/04 i 88/07) pod punom materijalnom i krivičnom odgovornošću dajem

**IZJAVU
PREDLOŽENOG ČLANA BIRAČKOG ODBORA / MOBILNOG TIMA**

OSNOVNA IZBORNA JEDINICA	
Naziv političkog subjekta koji dostavlja prijedlog	
Ime i prezime predloženog člana biračkog odbora/mobilnog tima	
Stručna sprema predloženog člana biračkog odbora/mobilnog tima	
Zanimanje predloženog člana biračkog odbora/mobilnog tima	
JMB i broj lične karte predloženog člana biračkog odbora/mobilnog tima	
Tačna adresa stanovanja predloženog člana biračkog odbora/mobilnog tima	
Broj telefona predloženog člana biračkog odbora/mobilnog tima	

Ja, _____, izjavljujem, kao lice koje je predloženo za člana (ime i prezime predloženog člana biračkog odbora/mobilnog tima) biračkog odbora/mobilnog tima da nemam smetnji iz člana 2.3 stav (1) Izbornog zakona BiH, da su svi podaci koji su navedeni u ovom obrascu tačni, da sam saglasan da na prijedlog navedenog političkog subjekta budem predložen za člana biračkog odbora/mobilnog tima, na izborima koji će biti održani dana: _____, da sam saglasan da prisustvujem obaveznoj obuci i provjeri znanja o načinu glasanja i brojanja glasova koju organizira izborna komisija, u skladu s planom i programom edukacije koji donosi Centralna izborna komisija BiH i Uputstvom o utvrđivanju kvalifikacija, broja, postupak žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje.

Datum: _____

(potpis predloženog člana biračkog odbora
koji odgovara potpisu na identifikacionom dokumentu)

M.P. _____
(potpis ovlaštenog lica političkog subjekta)



Na osnovu člana 2.19 stav (14) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08 i 32/10), i člana 16., 17. i 18. Uputstva o utvrđivanju kvalifikacija, broja članova, postupka žrijebanja i imenovanja, obuke, provjere znanja i certificiranja članova biračkih odbora i mobilnih timova za glasanje, izdaje se

C E R T I F I K A T

Ovim certifikatom potvrđuje se da je _____,
JMB _____ iz _____ prisustvovao obuci
koja se organizira za članove biračkih odbora/mobilnih timova u Bosni i
Hercegovini, u skladu s planom i programom edukacije koji donosi Centralna
izborna komisija BiH za provođenje izbora koji se održavaju _____
godine i da je sa uspjehom prošao provjeru znanja.

Certifikat izdaje:

Općinska /Gradska izborna komisija _____

Datum: _____

M.P. _____

Serijski broj: _____

Predsjednik/član izborne komisije